

En France. Vn Artisan n'attend point son paiement, qu'il ne reporte sa besogne : les Sauvages le demandent par auance.

En France. On ne se plaist pas beaucoup de voir tomber de la neige, ou de la grêle : c'est ce qui fait sauter d'aïse les Sauvages.

Ceux qui nauigent dans les vaisseaux d'Europe, descendent aux fond quand il pleut : les Sauvages au contraire, pour éuiter la pluie, se mettent à terre, renuersant sur eux, & sur leur bagage leur petit nauirè.

Quand vn Sauvage prend vn outil pour doler du bois, ou vn couteau pour couper quelque chose, il porte la main & le tranchant tout au contraire d'vn François : l'vn le porte en dedans, l'autre en dehors.

Les Europeans ne font point de difficulté de dire leurs noms, & leurs qualitez : vous faites vne confusion à vn Sauvage de luy demander son nom : si bien que si vous luy demandez comme il s'appelle, il dira qu'il n'en sçait rien, & fera signe à vn autre de le nommer.